

31. oktober

UKA2018/163

Naalakkersuisut nunatsinni eqqumiitsuliortut atorsinnaasaannik eqqumiitsuliortut suliffiannik pilersitsisinnaanermi pitsaaqutinik pitsaannequtinillu imaqartumik suliniummut pilersaarummik suliaqaqqullugit, suliniummullu pilersaarut kingusinnerpaamik UPA2020-imi Inatsisartunut agguanneqassasoq, pilersitsinermilu ingerlatsinermilu aningaasaqarnermut allanullu tunngasunik misissueqqissaarnermik imaqaqassalluni. Tamatuma saniatigut Naalakkersuisut eqqumiitsulioriaatsit sorliit sullivimmumut taamaattumut periarfissaqarnermik iluaquteqassanerat pillugit kaammattuuteqarnissaannik tunngasunik Inatsisartuni aalajangiiffisassatut siunnersuut.

Siumumiit siunnersuutigineqartoq pillugu imaattumik oqaaseqassaagut.

Siumut pingaartittuarnuuvaa kulturikkut nunatsinni ingerlatsinerit illersorneqartuarnissaat.

Inuiaqatigiit ilisarnaatigilluinnarpaat kultuurikkut sunngiffimmilu innuttaasut tamarmik uummaarissumik peqataalluarnerat. Inuiaqatigiit suliassarat innuttaasut kultuurikkut sunngiffimmilu peqataanissaannut pitsaanerusumik tunngavissiorinissaq kiisalu innuttaasunik qaammarsaanissaq periarfissiinissarlu.

Piorsarsimassutsikkut ineriartortitsineq tassaasaaq inuiaqatigiinnit aallaavilik inuiaqatigiit kissaataat pisariaqartitaallu aallaavigalugit. Siumumi isumaqarpugut piorsarsimassutsimut pisortaniit aningaasaliissutaasartut naalakkersuinikkut siunertarinqartunut naapertuutsinneqartassasut aamma tamanna kommuuninit ingerlan eqartassasoq Siumumiit isumaqarpugut.

Eqqumiitsuliortut, sanaluttartut, atuakkiortut nipilersortartullu suliaminnut atatillugu pikkorissartinneqartarnissaat suliaminillu ingerlatsiffissaat ineriartortinneqassaaq Siumumiit taamatut anguniagaqarpugut. Taamaattumik matumani siunnersuutigineqartoq takuneqarsinnaasutut siunnersuummi pineqartoq aalajangiiffissaq paasiuminaatsipparput kalaallisuuani allanneqarsimasooq aallaaviusussammaat tunngaviullunilu. Kisianni qallunaatut nutserneqarnerani aamma allatut paasineqarsinnaalluni, pineqarluni eqqumiitsuliortunut sannaviup tamatigoortup pilersinneqarnissaata pilersaarusionerqarnissaa suliarineqassasoq. Kisianni Siumumiit soorunami siunnersuutigineqartoq soqutigalugu Ataatsimiititaliami susassaartumi nalersorluarnissaa kaammattuutigaarput.

Oqallilluarisilu

Mala Høy Kuko, Siumut